

A Tribute to Aden Abdille Osman

Abwaan Mahamad Gaal Haayoow

Afrikana nin doorka u dhashee dib u xusuus dheere
Yay ku dagan dabeylaha is baddala door ku soo maraye
Dadku kugu yaboohaad siddaa duhur dharaareede
Dusha ku xiji yaan damac hunguri daaqad kaa ridine
Dadaal muuji duul baraka qaba waa u darartaah
Dallacaadda iimaanka iyo laabta daahirah
Daa'in kugu yaboohaa danbigi daafta kaa mariye.

Door shariifahaad uga jirtaa dulucda taariikhde
Diiwaanka qarankana ku qoran dacalka koobaade
Dadka iyo dalkaba waxaa anfaca geesi daacadahe
Damaashaadka Luuliyo bishii loo dabbaaldegayay
Bishii laysku daray labadii calan dayaxi soo baxaye
Dubka saarnaye Aadan Cabdullaan dayro ka imaane
Daldallaansi baa jiray raggaa dacar abuuraaye.

Dagaal laguma dayin doorashay uga lib dooneene
Markow todobo daw oo is xigay deyr walbo u jiiray
Gobannimadi lagu diirsadoow deebta ka afuufay
Haddii doonnigoow waday nin kale dacaygi loo dhiibe
Daadka raacay dibutaatiyaal diiddan baa helaye
Doorashadi ku dhacay waa ka degay siima dabageline
Dadaalkiisi waa loo darsaday waana dagi wayday
Dariiqaan rabnaan mari jirnaya nabad ku daanyoosho
Gabbalkeedi goortow dam yiri waa la kala dudaye.

Darajiyo ammaan nimaan lahayn uma ducaynayne
Daryeelkaadi Aadan Cabdulloow inaan ku deelqaafne
Ku dudurinne doqonkaaba oge doobbogoray weeye
Dibusocod dabbijo xeel bartaye jeelka kuu diraya
Kii ka daba dukaayiyo asagu wax isma doorshaane
Afrikana wax u daran ma'oga iyo waxuu danehe
Daa'inkaan wixii laga dalbado deyn ku jirihayne
Dallaallaale iyo caafimaad inow ku deeysiyo
Dinbidhaafna kuu raaciyya duco sokeeyaahe
Diintaad ku kala duwan tiihiin duqa Mandeellahe
Dadnimadase ways kala egtiihin libin u doodkaahe.

Dacwo furan nin doorkaan dibdhigin dowga ku habboone
Damiinkaan waxgaran looma diro xaajo dalableeye
Nin doolaalo dheer doonbirkow dabin ku arkaahe
Dalka u-gaara Aadan Cabdulliyo duulka kala haysta
Diiwaanka Unadoow ku qoray damac nin waayeele
Aqoon lagu dabbaqay waa dugsigi macallinka kuu doore
Darsigiisa kuu meeriyee qalin dawaaddiisu
Daruurga u egtahay kuugu qoraad dib ugu aaydaahe
Dagaalyahanka Aadan Cabdullaah howl ku-dayasho lehe
Dadka lagu dawaadshoow na baray waa la daafmaraye.

Dalka Xamar, Daafeed iyo Cigo daginka Boosaaso
Doolooow iyo Wajeer iyo ku dare daginka Ceelwaaqe
Dooxada Lughayiyo dushaan Saaxil ka aqaanno
Damalse buur ku yaal geedahow ugu da'weyn yahaye
Daafaha Wajaalana dadkii aniga igu hayste
Daandaansi igu maagayee hawadu doojayso
Dabeyshana ku liitoow intaan doontu kula ciirin
Soo dardaaran tiri Aadanoow duubay gogoshiye
Duq ribeeyay doqon quursataa waa ku dagantaah
Dakaddaa Jabuutina Diggool inow ku daanshoodo
Dib u hayst Aadan Cabdulloow kaama daadagine.

Gabar timaha dabataye xarrago doc ula liiceeyda
Duuduubna laysugu tidcaye deelka loo simaye
Hadday dagato duudkiyo garbaha daah u noqonayda
Daymo aragtideedana sidii ubaxi deyreede
Ku diirsaday cadceed kulul u egee baal dillaacsadaye

Oon dagdagine duunyada markay subax dareeraydo
Dooxa roob ku da'ay iyo markay dahan ku oodqaadde
Doog iyo naq lagu soofiyey darar ka maashaah
Hadday darata haaydiyo haddii weer dugdhabadeeyo
Gabar diris u haasaaw taqaan kama difaacdeene
Darrooriyo Awaariyo degmaday ariga daajaydo
Dadka kama dhixeydee dalkay joogto anigaa leh
Dooddeeda Aadan Cabdullaah daaqadda u furaye
Dushaan kala wareegee iska daa waa war doqoneede.

Doonniga hartiya owr dikane dabar ku seetaysan
Ee dowda loo wabax naqee duhato jiilaala
Afar gocayo loo kala dajiyee wiil dibjira dhaansho
Doobbadana labo daan ka ridee biyaha daabbulaya
Degmadoow ka guuxiyo dalkoow joogo anigaa leh
Afrikana wax iiguma darroo diinta iyo dhaqanka
Duulaan isugu soo dhawaan dumarna kala guursan
Dagalkiisa nimaan sheega karin iyo dadka u jooga
Dufu waa ku taal dabo kurteed loogu darimaah
Nin-door waaye Aadan Cabdullee wayska daafmaraye.

Dugsi macallimoow leeyahaye inow ka diinqaado
Dadaalkisu nimoow seejiyee doorasho u taagan
Ayadoo dahsoon Aadanoow dacayo baarkaagi
Nin ku diimayaan maalintaa dibadda soo bixiday
Dacayga uga bidayoo ku kacay dayro ololkeedi
Nin-darraagu waxow soo dumeey doqontu boobtaahe
Dan how galine Aadan Cabdullow dowladnimadeyni
Adigoow dagaalayoo ka diray doob-candhoolihiye
Dalluuntoow gumeysigu ku riday duhur ka-soosaare
Daacaddii garsoorkiyo la waay dood caddaaladahe
Dulmanuhu xaqiisii ku helay duudsan laga yeele
Dadku kuma illoobine ducaan kugu yaboohnaah
Daa'inkeey ha kaa wada hodmiyo labada daaroode.

AAMIIN.... AAMIIN.... AAMIIN.... AAMIIN.... AAMIIN....